

## Internaat

Kui olin juba mitu päevä koolimaja vahet ära käinu üteldi kodun, et nüüd pead ikki üüses jäämä koolimajja, kes sinnu egä päev saab sedasi edesi tagasi vedäde. Mia lei sis oma iku valla, ma tahtse iki egä päe üüses kodu saia, kodun jo miu kallis vanaesä ja kik tõise kah. Es avite sääil midägi, pidi iki nädäles aas sinnä koolimajja jääme. Ku koolitunni läbi saive kutsuti söögutappa süümä, kokatädi olli tennu sousti ja kardult, tõist muudu olli küll too süük ku kodun, aga kõtuk olli tühi ja pidi iki süümä. Seime sääil laua veeren ja olli kuulda ku üits lennuk lennäs üle koolimaja, naabrepoiss Valter üteli selle pääle "Kulleke ku soustilennuk lendäs" me hakasime kik lauaveeren naarme. Õpeteje pahands selle pääle ja lubas kike nurka panna.

Pääle süüki lätsime sis vällä mängme, teime ümmer koolimaja peituse mängu seni ku jälle sisse hõigati. Pidime hakkame koolitükke tegeme tõises päeväs, egä laua pääle pandi lambi põleme, enne ollime lambilaasi paprege ilusti puhtes pühkin, et tuli iki valgemb oles. Tollet aal elektert viil es ole ei koolin egä ka meil kodun, iki lambi pandi põleme. Sis ku kigel olli ärä õpitu ja peris õhtu kähen lätsime tõse kõrra pääle magame, sääil olli kaits tuba, üten magasive tüdruku ja tõisen poisi. Uni es taha mitte tulla, mõtli iki kodu pääle ja ikse raasike teki all, et tõise ei kuules.

Pikäpääle harjusi iki tolle internaadi eluge ära, laupäe saime sis kik jälle kodu minnä, lõbu olli laialt, Mäekülä lastel tulli nende esä hobese ja pikkvankrege järgi. ma küsse kah ennest vankre pääle. Olli iki tore küll kodu poole sõita. Talve olli iki peris kõva külma ilma, Hirmu vanaesä lasse miul tetä pika valge kasuku, tollege olli küll lämme vällän käiä, valge vildi kalossege ollive jalan. Talve saadeti meid koolimajast hulgandi karjalauda manu piimä tuuma, tollege läits meil lastel iki kõvasti aiga, kik raavi ja puhma tulli jo läbi käiä enne ku sinnä lauda manu saime. Laudan kallati kilumannergu piimä täis ja tulli jälle koolimajja tagasi minnä. Õhtus keedeti piimäsuppi, mia seda es süü, sei pallalt võid ja leibä, supp paiste säände sinine nigu oles vii sehen keedetü ja maik olli imelik. Muist latsi olli sääil oma söögi pääl, leväpäts olli neil ligi ja kausige hapukapstit ja karduleputru, pliidi päält saive tiivett võtta, sedäsi na sis seive .